



Broj: 01/1-02-2672/15
Ilijaš, 29.10.2015. godine

Z A P I S N I K

sa 34. (tridesetčetvrtre) sjednice Općinskog vijeća Ilijaš, održane dana 29.10.2015. godine, sa početkom u 10h.

Tridesetčetvrtom sjednicom OV-a Ilijaš predsjedavao je zamjenik predsjedavajućeg Općinskog vijeća Ilijaš g-din Mahir Dević.

Prisutni vijećnici:

RB.	IME I PREZIME
SDA	
1	MAHIR DEVIĆ
2	NEDIM MATORUGA
3	SAUDIN DURMIĆ
4	HALID DIZDAREVIĆ
5	MUAMERA MASNOPITA
6	MUAMER DERVIŠEVIĆ
7	FAHIR HASANOVIĆ
8	RASIM ŠEHIĆ
9	SELMA PUŠINA
SDP	
10	ALAN ŠERAK
11	MARIONETA ILIĆ-JURETA
12	-
13	SELVER HERIĆ
SBB	
14	ADEM EFENDIĆ
15	NIJAZ MAŠIĆ
16	SEAD ŠEHIĆ
17	AKIF BEŠLIJA
SAMOSTALNI VIJEĆNICI	
18	EDHEM HASANOVIĆ
19	ASIM MUJIĆ
20	NIHAD BUČUK
21	ENES DIZDAREVIĆ
STRANKA ZA SREDNJE	
22	BESIM GLJIVA
23	AIDA MALIŠEVIĆ

	LDS
24	NIJAZ RASTODER
	BPS
25	MUHAMED HANDŽIĆ

Odsutni vijećnik:

1. Damir Filipović

Prisutni gosti:

1. Aida Muratović - Radio Ilijaš
2. RTV Vogošća
3. Mirsad Hamzić – predsjednik Savjeta MZ Malešići
4. Alen Matoruga – predsjednik Savjeta MZ Misoča
5. Mehmed Smajlović – predsjednik Savjeta MZ Mrakovo
6. Almir Špiodić – predsjednik Savjeta MZ Podlugovi
7. Almira Ćosić – zastupnica u Parlamentu FBiH
8. Vijeće učenika SŠC “Nedžad Ibrišimović” Ilijaš
9. Samra Filipović-Hadžiavdin – direktorica Agencije za ravnopravnost spolova BiH
10. Kika Babić-Svetlin – stručna savjetnica u Agenciji za ravnopravnost spolova BiH
11. Adna Masnopita-Kadrić – profesorica psihologije u SŠC “Nedžad Ibrišimović” Ilijaš
12. Adela Hadžiomerović – predstavnik NVO “ANDANTE SEE”

Ostali prisutni:

1. Akif Fazlić – općinski načelnik
2. Zdravko Barić – pomoćnik načelnika
3. Nijaz Spahić – pomoćnik načelnika
4. Merima Osmanović – pomoćnik načelnika
5. Alma Imamović – pomoćnik načelnika
6. Sanja Zagorac-Jozić – pomoćnik načelnika
7. Meliha Avdibegović – pomoćnik načelnika
8. Sadeta Brkić – pomoćnik načelnika
9. Ilda Kahriman – sekretar OV-a Ilijaš
10. Adha Masnopita – stručni saradnik u Službi za društvene djelatnosti
11. Aida Čutura-Marić – stručni saradnik u Stručnoj službi OV-a i općinskog načelnika
12. Maida Habibović – zapisničar.

Zamjenik predsjedavajućeg je otvorio sjednicu i konstatovao da postoji kvorum za odlučivanje.

Pročitao je predloženi dnevni red i dao na razmatranje zapisnik sa prethodne sjednice Općinskog vijeća Ilijaš.

Primjedbi na zapisnik nije bilo, pa je Općinsko vijeće jednoglasno usvojilo zapisnik sa 33.sjednice.

Zatim je dao na razmatranje predloženi dnevni red.

Nijaz Rastoder – vijećnik LDS-a

Predložio je da se tačka 7. Prijedlog Odluke o davanju saglasnosti za zaključivanje i potpisivanje aneksa ugovora o prodaji (k.č.br.1507/5 i 1508/2 K.O. Ilijaš Grad – novi premjer) skine sa dnevnog reda obzirom da nedostaje skica lokacije.

MAHIR DEVIĆ – zamjenik predsjedavajućeg

Predložio je da se u toku sjednice dostavi skica lokacije za 7. tačku dnevnog reda tako da prijedlog dnevnog reda ostane isti.

Primjedbi na predloženi dnevni red više nije bilo, pa je Općinsko vijeće Ilijaš jednoglasno usvojilo slijedeći

DNEVNI RED

1. Vijećnička pitanja i inicijative
2. Izvještaj o realizaciji zaključka sa 33. sjednice
3. Izmjene i dopune Budžeta Općine Ilijaš za 2015. godinu
4. Informacija o izvršenju Budžeta Općine Ilijaš za period 01.01.-30.09.2015. godine
5. Prijedlog Odluke o zonama sanitarne zaštite i zaštitnim mjerama za izvorište "Vrutak"
6. Prijedlog Odluke o zonama sanitarne zaštite i zaštitnim mjerama za izvorišta "Petnjik", "Tuk", "Javor" i "Korita", u MZ Dragoradi
7. Prijedlog Odluke o davanju saglasnosti za zaključivanje i potpisivanje aneksa ugovora o prodaji (k.č.br.1507/5 i 1508/2 K.O. Ilijaš Grad – novi premjer)
8. Prijedlog Odluke o usvajanju "Lokalnog akcionog plana za provedbu UN Rezolucije 1325 u Općini Ilijaš za period 2016-2017. godine
9. Prijedlog Odluke o načinu i uslovima prodaje neizgrađenog građevinskog zemljišta (k.č.br.1033/7, 968/10, 965/6, 964/6, 963/6 K.O. Ilijaš Grad - novi premjer)
10. Prijedlog Odluke o načinu i uslovima prodaje neizgrađenog građevinskog zemljišta (k.č.br.1506/2 i 1505/2 K.O. Ilijaš Grad - novi premjer)
11. Prijedlog Odluke o načinu i uslovima prodaje neizgrađenog građevinskog zemljišta (k.č.br.56 K.O. Ilijaš Grad - novi premjer)
12. Prijedlog Odluke o izmjeni Odluke o neposrednoj pogodbi za prodaju neizgrađenog građevinskog zemljišta (Odluka br.01/1-02-2452-13/15 od 29.09.2015. godine)
13. Prijedlog Odluke o izmjenama i dopunama Pravilnika o stipendiranju i nagrađivanju izuzetno nadarenih učenika i studenata
14. Prijedlog Rješenja iz imovinsko-pravne oblasti broj:04-31-853/05
15. Saglasnost na izmjenu namjene lokaliteta kojim je planirana sportska ploha (košarkaško igralište) u namjenu za potrebe izgradnje parking prostora, na lokalitetu Banovac, a u obuhvatu Regulaciono plana Banovac
16. Informacija o uspjehu i odgoju učenika u osnovnim i srednjim školama, na području općine Ilijaš u školskoj 2014/2015. godini

AD-1

Vijećnička pitanja i inicijative

ENES DIZDAREVIĆ – samostalni vijećnik

Inicijativa:

1. Pokrećem inicijativu da se u mjestu Kamenica (Crna Rijeka) na dijelu puta kod doma i kod džamije postave usporivači saobraćaja (2 kom.).

Obrazloženje: U razgovoru sa građanima pomenute Mjesne zajednice, iskazana je zabrinutost za sigurnost učenika i pješaka, a zbog ne savjesnih vozača koji na tom dijelu voze velikom brzinom. Poznato je da se na tom lokalitetu nalazi i područna škola. Isto tako je poznato da zbog velike teritorijalne površine Općine, nije u mogućnosti konstantno prisustvo policije, a što odgovara pomenutim vozačima, te iz tih razloga pokrećem ovu inicijativu da bi se izbjegla mogućnost brze vožnje i povećala sigurnost ostalih učesnika u saobraćaju.

NEDIM MATORUGA – vijećnik SDA

Samo da naglasim da je kolegica Selma Pušina pokrenula inicijativu za postavljanje usporivača saobraćaja kod svih osnovnih škola na području Općine Ilijaš. Informaciju koju imamo jeste da je nadležno ministarstvo odobrilo postavljanje usporivača saobraćaja kod svih osnovnih škola u Općini Ilijaš, a već je realizovano kod SŠC "Nedžad Ibrišimović" Ilijaš, a kod svih ostalih osnovnih škola će se raditi usporivači saobraćaja. Direkcija za ceste već je dobila nalog da se to radi.

NIJAZ RASTODER – vijećnik LDS-a

Nisam dobio odgovore na moja suština pitanja postavljena na prethodnoj sjednici Općinskog vijeća Ilijaš.

Prvo, odgovor od DZ "Ilijaš" vezano o kakvim aparatima se radi, direktor mi je odgovorio da ja nešto imam protiv medicinskog osoblja, a što nije tačno. U svom pitanju sam pitao o kakvim aparatima se radi?

Drugo, pitanje koje sam postavio za spajanje placeva na Karašnici, nisam tražio da se odgovor personalizira i dostavljaju imena i prezimena. Interesuje me suštinsko pitanje, a to je da li je time došlo do narušavanja Budžeta Općine Ilijaš.

Treće, pitanje vezano za pijacu. Očito je da mi je dobro odgovoreno, pijaca radi na "divlje", nema nikakvih papira, nije pokrivena inspekcijским papirima. Drugo, pitanje ko naplaćuje parking ispred TC "Bingo", odgovoreno je da to radi "Vodostan", a u dogovoru sa TC "Bingo". Sada postavljam slijedeće pitanje, obzirom da se radi o javnom privatnom partnerstvu:

1. Tražim ugovor sklopljen između TC "Bingo" i JKP "Vodostan" o naplati parkinga ispred TC "Bingo".

Dalje, postavio sam pitanje vezano za oborinske vode u ul. Kakanjska i nisam dobio odgovor, a pitanje je nadležna služba prosljedila JKP "Vodostanu". Molim vas da to ne prosljeđujete JKP "Vodostan", jer oni nemaju nikakve odgovornosti, a odgovornost ima firma koja je rekonstruisala ulicu, Općina Ilijaš i Direkcija za ceste Kantona Sarajevo. Od kada je ta ulica rekonstruisana ljudi imaju pune podrumne vode. Možda bi trebao načelnik poslati komisiju da snime stanje i urade predmjer i predračun radova za par šahtova i stanje vrati u prvobitno kada ljudi nisu imali problema sa ovim.

NIJAZ MAŠIĆ – vijećnik SBB-a

Inicijative:

1. Zahtijeva da nadležna služba utvrdi ko je i uz čije odobrenje presjekao asfaltni put na dva mjesta i postavio odvodne cijevi, a da po završetku radova nije ponovo

asfaltirao već ostavio oštećenu putnu trasu. Navedena oštećenja nalaze se na samoj raskrsnici dionice puta iz Mrakova prema Vratuši u blizini kontejnera i trafostanice. Istom inicijativom zahtijevam da općinski načelnik nakon uviđaja naložio onom ko je izvodio radove da zakrpi asfaltom navedena oštećenja puta.

2. Molim nadležnu službu da izađe na teren, putni pravac Mrakovo-Vratuša u blizini kuće Nijaza Mašića i Feketa Sulejmanovića i snimi stanje funkcionisanja i održavanja kanalizacije na pomenutoj tački gdje je došlo do vidnog sužavanja postavljanjem šahte za telekomunikaciju. Uz blizinu šahta, udaljenost manje od 1m nalazi se drvo (hrast) ispod privatnog posjeda na javnoj površini, čije žile smetaju normalnom protoku vode. Nakon uviđaja od nadležne službe zahtijevam da izda rješenje o obaranju i isto ukloni.
3. Izvođači radova na postavljanju kabla za telekomunikaciju na putu Mrakovo-Vratuša položili su ga u postojeću kanalizaciju ili pored nje i vodno sužili kanal i smanjili njegovu funkciju. Građani uz ovu putnu komunikaciju zahtijevaju da izvođač radova podhitno očisti kanal, kako bi isti mogao normalno odvoditi vodu koja se pojavljuje prilikom padavina. Na ovoj dionici česti su izlivi vode u dvorišta i kuće građana koji žive ispod puta.

MUHAMED HANDŽIĆ – vijećnik BPS-Sefer Halilović

Moram reći da sam dobio odgovore na pitanja sa prošle i prethodne sjednice Općinsko vijeća Ilijaš koji su zaista ponižavajući za mene kao vijećnika, a vjerujem i za moje kolege ako su čitali odgovore. Primjećujem da Služba koja donosi prijedloge Odluka ovom Vijeću na usvajanje zaista donosi tendenciozno i usmjerena prema određenim licima, a ne usklađujući ih prema Zakonu i pravima.

Zar trebam čekati tri mjeseca na odgovor o izvještaju Komisije za poslove mjesnih zajednica i saradnju sa drugim općinama i gradovima, a prije toga nazovu mog kolegu Mehmeda Smajlovića i kažu "Šta ovo Handžić piše protiv tebe", a ja nisam spomenuo niti Mehmeda Smajlovića niti bilo koga, a pominjem predsjednika Komisije za poslove mjesnih zajednica i saradnju sa drugim općinama i gradovima i spojivost ili ne spojivost funkcije sa funkcijom predsjednika savjeta mjesne zajednice. Odgovor mi dala nadležna Služba da to nije definisano Zakonom, ali Zakonom je definisano ne spojivost funkcije predsjednika Savjeta MZ-e i vijećnika. To je Vijeće je donijelo Odluku, što nije istina da igdje u Zakonu piše. Molim gospodu iz Službe koja je dala ove odgovore da nastoji da se koriguje sa Zakonom, jer mi (bar polovina) vijećnici čitamo materijale za Vijeće.

Pitanje:

1. Zašto nadležna Direkcija za ceste Kantona Sarajevo nije riješila problem odvodnje površinskih voda na dionici puta od mosta u Mlinima do skretnice za Osnovnu školu "Stari Ilijaš".

Obrazloženje: Naime, na navedenoj dionici puta usljed padavina i otapanja snijega dolazi do formiranja nakupina vode uz trotoar kuda prolaze pješaci, a posebno učenici OŠ "Stari Ilijaš", pa se četo desi da svi oni koji u tom periodu koriste tu putanju budu i okupani zapljuskivanjem od strane vozila koja se kreću iz pravca Ilijaša.

Ovaj problem sam istakao na još jednoj od prethodnih sjednica Općinskog vijeća Ilijaš, ali on i do danas nije u potpunosti riješen.

Prilog: Zahtjev Lepić Mustafe upućen Općinskom načelniku 23.10.2015. godine

HALID DIZDAREVIĆ – vijećnik SDA

Inicijativa:

1. Pokrećem inicijativu prema Kantonalnoj Direkciji za ceste da riješi pitanje odvodnje na lokalitetu Malešići u blizini mostića, a iza pružnog prelaza iz pravca Sarajevo-Ilijaš. Naime, radi se o tome da oborinske vode nakon prve kiše vlasniku Mustafi Isoviću naprave poplavu u kući (podrumu).

ALAN ŠERAK – vijećnik SDP-a

Inicijativa:

1. Pokrećem inicijativu da se u MZ Kamenica kod mezarja Šehovići uradi potporni zid, jer se osipa zemlja.

Pitanje:

1. Danas JKP "Rad" nije u mogućnosti obavljati svoje redovne poslove za koje su plaćeni, a radi se o zelenoj površini koja je nepravедno uzurpirana od strane pojedinih ljudi koji imaju privatne lokale. Ovdje se radi o objektu "Mistik". Dakle, pitanje je da li navedeni objekat posjeduje svu potrebnu dokumentaciju. Insistiram da mi se do slijedeće sjednice Općinskog vijeća Ilijaš dostavi sva potrebna dokumentacija koja se tiče caffe objekta "Mistik" radi uvida da li su isti objekti građeni u skladu sa Prostornim, odnosno Regulacionim planom grada Ilijaš.

MUAMER DERVIŠEVIĆ – vijećnik SDA

Pitanje:

1. Zašto su obustavljeni radovi na izgradnji ograde oko mezarja u Starom Ilijašu? Molim odgovor na današnjoj sjednici.

AKIF BEŠLIJA – vijećnik SBB-a

Pitanje:

1. U kojoj je fazi izrada prijedloga rješenja iz imovinsko-pravne oblasti vezano za proglašenje općeg interesa za oštru krivinu u naselju Mrakovo?

Obrazloženje: Već duže vremena se vode aktivnosti u proglašenju interesa na dijelu lokalnog puta od kantonalnog značaja Ilijaš-Popovići (oštra krivina u naselju Mrakovo). Radi se o veoma opasnoj i zahtjevnoj krivini koja se može uporediti sa "crnom tačkom". Projekat za rješenje iste postoji kao i nadležni izvođač radova, jedino nedostaje Rješenje o proglašenju općeg interesa.

Inicijative:

1. Pokrećem inicijativu da općinski načelnik pripremi Sporazum o sufinansiranju sa investitorima izgradnje apartmanskog naselja u Popovićima, a koji se odnosi na nastalu evidentnu štetu na lokalnom putu Ilijaš-Popovići koju treba što prije sanirati.

Obrazloženje: Izgradnja Apartmanskog naselja u Popovićima je u završnoj fazi što znači da veliki teret neće opterećivati navedeni lokalni put. Trasa puta Ilijaš-Popovići korištena je u navedene svrhe ponekad i preko dozvoljene težine gdje je na zahtjev intervenisala i policija. Predstavnici Direkcije za puteve Kantona Sarajevo su prije otpočetih radova na

navedenom naselju izvršili obilaza i utvrdili video zapisom u kojem je stanju navedeni put. Sad su značajna oštećenja što već ugrožava kretanje normalnog saobraćaja i pješaka koji se njime kreću.

2. Na osnovu zahtjeva građana Solakovića i saglasnosti Savjeta MZ-e Ljubina pokrećem inicijativu da se malonogometni turnir "Azmir Halilović Mire" koji je izbrisan iz Općinskog kalendara za obilježavanje značajnih događaja ponovo uvrsti u isti, u vremenskom periodu kako je i proteklih godina obilježavan.

Obrazloženje: Radi se o malonogometnom turniru koji je prvi put organizovan 1997. godine pod imenom "Azmir Halilović Mire", da bi se 2010. godine pokušao ukinuti i preimenovan bez ikakve saglasnosti Organizacionog odbora, građana i Mjesne zajednice Ljubina, te tako faktički izbrisan iz Općinskog kalendara za obilježavanje značajnih događaja.

Podsjećanja radi, ovaj malonogometni turnir je jedan od najposjećenijih na području Općine Ilijaš, gdje svake godine učešće na istom uzme preko deset ekipa, okupi veliki broj građana sa području Općine Ilijaš, Vogošće i Olova. Samim tim što je turnir organizovan 1997. godine, od velikog je značaja za ovu lokalnu zajednicu i šire, te se radi o jednoj od najstarijih manifestacija poslijeratnog perioda. Samim tim ne treba dopustiti bilo kakva špekulisanja oko naziva turnira, jer isti postoji punih 19 (devetnaest) godina pod nazivom "Azmir Halilović Mire".

BESIM GLJIVA – vijećnik Stranke za Srednje

Pitanje:

1. Šta je razlog pa na izvorištu "Vrela" još nije instaliran hlorinator koji je Općina Ilijaš kupila još prije godinu i više i isti je pohranjen, po mojim saznanjima, u magacinu JKP "Vodostan" Ilijaš?
Navedeno izvorište koristi šire područje MZ Gajevi i voda se koristi za piće, a istu je neophodno povremeno hlorisati.
2. Ko je nadležan za sanaciju makadamskog puta od Gajeva, odnosno Vrutaka do Podlipnika i dalje prema Sirovinama koji je u užasno lošem stanju, a istim KJP "Sarajevo-šume" d.o.o. Sarajevo vrše eksploataciju u posljednjih najmanje 15 (petnaest) godina? Molim da se poduzmu određene aktivnosti po ovom pitanju.

Inicijative:

1. Pokrećem inicijativu da se u što kraćem roku izvrši djelimična sanacija puta za Velike Šume koji je u velikoj mjeri stradao usljed obilnih padavina. U navedenom naselju žive isključivo povratničke porodice i u navedeno selo nisu u poslijeratnom periodu ulagana gotovo nikakva sredstva u infrastrukturu.
2. Pokrećem inicijativu da ambulanta u Gajevima počne funkcionisati dva dana u sedmici minimalno četiri sata dnevno. Također je neophodno da ambulanta u Kamenici radi puno radno vrijeme u danima kada je ista u funkciji.
3. Pokrećem inicijativu da se građanima koji žive na području MZ Gajevi, Srednje, Dragoradi i Kamenica omogući uplata ogrjevnog drveta na području na kojem žive kako bi im uveliko smanjili troškove prilikom nabavke ogrjevnog drveta, a ne da se isti upućuju na lagere "Sarajevo-šuma" koji su nekada udaljeni od naselja i po 20 km.

4. Pokrećem inicijativu da se prilikom kreiranja Nacrta Budžeta Općine Ilijaš za 2016. godinu obavezno predvide sredstva za djelimičnu sanaciju izvorišta Vrela kako bi se obezbjedio veći dotok vode u izvorište, jer ovom području prijeti totalni kolaps u vodosnadbijevanju, pošto je vodozahvat "Vrutak" za koji je izrađen projekat izgleda samo jedna velika nada za ovo područje. Razlog su prije svega velika investicija cca 1.500.000 KM, a pomalo i naša ne zainteresiranost da ovaj projekat stavimo u prioritet. Navedeni vodozahvat "Vrutak" bi riješio cijelo tzv. gornje područje Općine Ilijaš obuhvatajući i zaštićeni pejzaž Bijambare sa dovoljnim količinama vode, a čak bi se mogle predvidjeti određene količine i za sam grad Ilijaš.

SELVER HERIĆ – vijećnik SDP-a

Nadovezao bih se na inicijativu Besima Gljive vezano za uplatu ogrjevnog drveta građanima Općine Ilijaš.

Svjedoci smo da JKP "Sarajevo-šume" sa područja Ilijaša sijeku preko 50% sortimenata, a ostalo sa osam općina u Kantonu Sarajevo. Naime, zabranjena je uplata ogrjevnog drveta građanima Općine Ilijaš, a Besim reče da građane šalju na svoje lagere, ali ni na lagerima nema drveta. Znači, zabranjena je uplata ogrjevnog drveta, primoravaju stanovništvo da krade da bi dolazili do prekršajnih krivičnih prijava, a znamo da nije ni gruntovno uređeno vlasništvo po avionskom snimanju. Građani su primorani da kradu drva.

Privatnici mogu uplatiti bukov ogrjev, a naši građani ne mogu. Predlažem da ovo pitanje pretvorimo u zaključak i dostavimo "Sarajevo-šumama" da odobri uplatu ogrjevnog drveta našim građanima.

MARIONETA ILIĆ-JURETA – vijećnica SDP-a

Inicijative:

1. Pokrećem inicijativu da se još jednom izađe na teren i utvrdi stanje vodosnadbijevanja u naselju Povoča, te ispita i nađe rješenje za stanovništvo naselja Povoča i Ulištovići.
2. Pokrećem inicijativu da se spoje izvori ispod Korita, te napravi jedan veći bazen koji bi napravili i finansirali JKP "Vodostan" Ilijaš, te postavili satovi kako bi se na taj način vršilo i plaćanje. Na taj način bi se riješila i prethodna inicijativa.

AKIF FAZLIĆ – općinski načelnik

Kada je u pitanju vijećničko pitanje za ograđivanje mezarja u Starom Ilijašu, znate da su Budžetom za 2015. godinu predviđena sredstva od 32.000 KM za projekat ograđivanja mezarja u Starom Ilijašu. Proveden je postupak i izabrana firma iz Sarajeva sa ponudom od cca 25.500 KM, sklopio se ugovor i započeti radovi. Nažalost, onako kako su započeti radovi morao je reagirati inspektor i obustaviti radovi. U fazi je raskid ugovora i ponovo će biti započet postupak izbora novog izvođača radova.

MAHIR DEVIĆ – zamjenik predsjedavajućeg

Imamo prijedlog zaključka Selvera Herića koji bi otprilike glasio ovako, a upućen KJP "Sarajevo-šume" : "Da se omogući uplata ogrjevnog drveta građanima Općine Ilijaš koji ni na kakav način nisu u mogućnosti obezbjediti ogrjevno drvo, na što bližem lokalitetu. Znači da menadžment Sarajevo-šuma obezbjedi mogućnost uplate i doznačivanje drveta za

sječu na području Općine Ilijaš.

Općinsko vijeće je jednoglasno donijelo

ZAKLJUČAK

Koji se upućuje menadžmentu KJP "Sarajevo–šume" d.o.o. Sarajevo, da omogući građanima Općine Ilijaš mogućnost uplate i doznačavanje drveta za sječu na području Općine Ilijaš.

Zaključak dostaviti i Upravi za šumarstvo Kantona Sarajevo.

AD-2

Izvještaj o realizaciji zaključka sa 33. sjednice

Diskutanata po ovoj tački dnevnog reda nije bilo, pa je OV-e jednoglasno usvojilo

Izvještaj o realizaciji zaključka sa 33. sjednice

AD-3

Izmjene i dopune Budžeta Općine Ilijaš za 2015. godinu

MAHIR DEVIĆ – zamjenik predsjedavajućeg

Predlagač je uložio amandman kojeg je Komisija za administrativne poslove, budžet, privredu, finansije i ekonomska pitanja prihvatila i koji je sastavni dio Izmjena i dopuna Budžeta Općine Ilijaš za 2015. godinu.

Amandman glasi: "Sa budžetske pozicije "613978 – Izdaci po osnovu drugih samostalnih djelatnosti i povremenog rada – izdaci za jedinicu i članove štaba CZ" iznos od 4.000,00 KM, prebaciti na budžetsku poziciju "613976 – Izdaci po osnovu drugih samostalnih djelatnosti i povremenog rada – ostali izdaci za druge samostalne djelatnosti i povremeni rad", tako da u prijedlogu Izmjena i dopuna budžeta navedene pozicije izgledaju:

"613978 – izdaci za jedinicu i članove štaba CZ	35.500,00 KM
"613976 – izdaci po osnovu drugih samostalnih djelatnosti i povremenog rada	45.000,00 KM

Ostale budžetske pozicije bi ostale nepromijenjene."

Obrazloženje: Kako bi se ubrzao proces digitalizacije arhive katastra nekretnina, a u skladu sa potpisanim sporazumom između Općine Ilijaš i Federalne geodetske uprave potrebno je angažovati dodatno dva uposlenika po ugovoru o djelu na poslovima digitalizacije, te je u tu svrhu neophodno povećanje sredstava na datoj poziciji, odnosno povećanje na uštrb pozicije izdaci za jedinice i članove štaba CZ.

MERIMA OSMANOVIĆ – pomoćnica načelnika za privredu, finansije i investicije

Budžet Općine Ilijaš za 2015. godinu sa planiranim prihodima i primicima je usvojen u iznosu od 8.978.400,00 KM, odnosno rashodima i izdacima od 8.978.400,00 KM.

Izmjenama i dopunama za 2015. godinu na 32. sjednici OV-a utvrđen je budžet sa planiranim prihodima i primicima u iznosu od 9.906.200,00 KM, odnosno rashodima i izdacima u iznosu od 9.906.200,00 KM. Od momenta donošenja Izmjena i dopuna Budžeta desile su se određene promjene koje su uticale kako na strukturu tako i visinu prihoda odnosno rashoda. Tako da su se stvorili zakonski i drugi uslovi za pokretanje procedure novih Izmjena i dopuna Budžeta Općine Ilijaš za 2015. godinu. Ovim Izmjenama i dopunama Budžeta Općine Ilijaš za 2015. godinu utvrđuju se ukupni prihodi i primici u iznosu od 10.631.900,00 KM, što u odnosu na osnovni plan predstavlja povećanje za 725.700,00 KM odnosno za 7% u odnosu na aktuelni plan Budžeta za 2015. godinu. Kao najznačajnije promjene prihoda koji su tretirani Izmjenama i dopunama Budžeta izdvajamo slijedeće:

Skupština Kantona Sarajevo je usvojila Izmjene i dopune Budžeta Kantona Sarajevo kojim se u okviru pozicije kapitalni transferi nižim nivoima vlasti predviđene određene izmjene kada se tiče kapitalnih transfera za Općinu Ilijaš:

Takođe zabilježen je rast prihod u okviru pojedinih budžetskih pozicija gdje izdvajamo:

- porez na promet nepokretnosti i prava,
- prihode po osnovu naknade za rentu i uređenje građevinskog zemljišta,
- uvećanje prihoda po osnovu komunalnih naknada,
- uvećanje prihoda po osnovu Zakona o dopunskim pravima boraca,
- uvećanih transfera po osnovu tekućih i kapitalnih primitaka od kantona,
- ukidanje pojedinih budžetskih pozicija za koje nije realno očekivati da će se realizovati u 2015. godini i
- preuzimanje obaveza drugih nivoa vlasti za određene projekte.

Porez na finansijske i kapitalne transakcije porez na promet nepokretnosti je kroz Izmjene i dopune povećan za 250.000,00 KM odnosno za 33%. Prijedlog je realan i ostvariv obzirom da je u momentu izrade aktuelni plan premašen i realno je da će se do kraja godine i ostvariti na planiranom nivou.

Na budžetskoj poziciji komunalne naknade za istaknutu firmu došlo je do povećanja za 40.000,00 KM ili 24% kao rezultat dodatnog angažovanja porezne uprave FBiH kroz prinudnu naplatu ove vrste prihoda iz ranijeg perioda. Naknada za uređenje građevinskog zemljišta i prirodna pogodnost je povećana za 100.000,00 KM zbog aktuelnog trenda gradnje individualnih objekata i privrednih subjekata kao i izmirenja ranijih obaveza od strane Kantona Sarajevo po osnovu Zakona o dopunskim pravima boraca.

Primljeni tekući transferi uvećani za 28% takođe po osnovu Zakona o dopunskim pravima boraca (dženaze/sahrane, odnosno nosioce ratnih priznanja primljenih zaostalih transfera iz prethodnog perioda)

Uvećani kapitalni transferi od ostalih nivoa vlasti kantona po osnovu novo uvedene pozicije u Budžetu Kantona Sarajevo za rješavanje saobraćaja u mirovanju i pristupnih puteva za objekte kolektivnog stanovanja u iznosu od 100.000,00 KM.

Ostale budžetske pozicije u okviru kojih je došlo do povećanja su posljedica uvećanja kod izvršenja i nisu značajno uticale na samu strukturu budžeta, pa ih i nećemo posebno obrazlagati.

Izmjenama i dopunama budžeta rashodi i izdaci su predloženi u iznosu od 10.631.900,00 KM što u odnosu na osnovni plan predstavlja povećanje za 7%.

Bruto plaće i doprinosi za uposlene i izabrane zvaničnike su zadržani na nivou osnovnog plana.

Izdaci za materijal, sitni materijal i usluge zadržani su na nivou osnovnog plana, ali je u okviru pojedinih budžetskih pozicija došlo do izmjena u osnovu na osnovni plan što je pojedinačno i prikazano kroz obrazloženje Izmjena i dopuna budžeta.

Kapitalni transferi i izdaci su Izmjenama i dopunama budžeta planirani u iznosu od 5.571.000,00 KM što predstavlja povećanje u odnosu na aktuelni plan za 14%, a detaljan pregled izmjena, odnosno povećanja i smanjenja u okviru kapitalnih transfera vidljiv je u okviru plana razvojnih programa i nećemo i h posebno obrazlagati.

Realizacijom ovih Izmjena i dopuna budžeta u potpunosti bi se i dalje zadržala finansijska stabilnost, kao i završili započeti projekti kao i realizovao jedan broj novih projekata i predlažemo Općinskom vijeću da isti usvoji.

MUHAMED HANDŽIĆ – vijećnik BPS-Sefer Halilović

Primjetio sam ono što sam cijelu godinu i prethodne dvije godine potencirao, a to je "nakaradan" Zakon o javnim nabavkama. Dakle, on je dao mogućnost izvođačima radova da naplate i ono što nisu uradili. U ovom slučaju govorim o ugovoru firme "Halilović" ili kako se već zove. Za zimsko održavanje od planiranih 250.000,00 KM plaćeno 138.332,00 KM za ovu godinu, a znamo kakve su bile sniježne padavine 2014/2015. godinu. Morali su možda izaći 2-3 puta i naplate 138.000,00 KM. Evo šta su javna nabavke i na koji način se troše pare.

Jednom sam dobio objašnjenje od pomoćnice načelnika, a drugo nije mogla ni dati, da su oni mobilni i da u slučaju da i ne upale mašinu i nema potrebe za čišćenje snijega naplatit će 50% od ugovorene cijene, dakle 125.000,00 KM.

Što se tiče Izmjena i dopuna budžeta tražim da se objasni stavka Izdaci po osnovu drugih samostalnih djelatnosti 45.000,00 KM, jer ne znam o čemu se radi.

MAHIR DEVIĆ – zamjenik predsjedavajućeg

Ovo je prijedlog Izmjena i dopuna Budžeta i ako neko hoće nešto da promjeni neka uloži amandman.

AKIF FAZLIĆ – općinski načelnik

Zamolio bih da se vratimo na tačku dnevnog reda Izmjene i dopune Budžeta Općine Ilijaš za 2015. godinu i da budemo zaista korektni.

Pričamo o stavci izvršenja, o stavci koja je usvojena na polugodišnjem izvještaju koji je usvojen na kojem se raspravljalo o svakoj stavci na izvršenju. Imali smo informaciju o izvršenju za I kvartal na kojoj je takođe ovo bilo. To su tačke na kojima se priča vezano za cifre o izvršenjima. Ne znam iz kojih razloga sada kada donosimo rebalans pričamo o izvršenju neke stavke.

Planirano 250.000,00 KM za zimsko održavanje, a imamo dva ugovora koja su provedena tenderom. Jedan je 220.000,00 KM i drugi je kada nam je Direkcija vratila 30.000 km prije dvije godine dodatno na održavanje cca 70.000,00 KM. Znači, blizu 300.000,00 KM su ugovori provedeni po javnim nabavkama, a izvršenje je svega 136.000 ,00 KM. Znači duplo manje nego što je po ugovorima dobivena cifra. Ja želim biti korektan, jer se ne radi o tački dnevnog reda, ali kada su u pitanju finansije ništa ne smije biti sakriveno. Svi ugovori i fakture se mogu predočiti.

Dakle, nije problem da se ovoj cifri priča, ali danas nije trenatak da rebalans opterećujemo sa nekom tačkom izvršenja.

MUHAMED HANDŽIĆ – vijećnik BPS-Sefer Halilović

Kolega Deviću molim Vas da sjednicu ne usmjeravata tokom koji Vama odgovara, jer to

radite čitav ovaj mandat i mene sigurno nećete kanalisati. Ja želim raditi u skladu sa Zakonom i Poslovníkom, a ne Poslovníkom koji Vi modifikujete nekim aneksima.

Vama gospodine načelníe nije suvišno da date informaciju o 138.000,00 KM. Niko ne sumnja da to vi niste dali, a možda ste dali njima i ono što nisu zaradili i iz tog razloga sam tražio pojašnjenje izvršenje budžeta.

Ako je to suvišno onda ima dosta pitanja koja bih mogao postaviti zamjeniku predsjedavajućeg koja su dolazila prije 2-3 sjednica na nekoj sjednici da se usvoje, jer se nisu usvojila na nekoj prethodnoj sjednici.

Znači, morate biti malo fleksibilni kada su u pitanju i drugi vijećnici, a ne samo vijećnici iz vaše grupe.

MAHIR DEVIĆ – zamjenik predsjedavajućeg

Dat ću samo poslovničko obrazloženje.

Znači, imamo tačku koja se zove Izmjene i dopune Budžeta Općine Ilijaš za 2015. godinu i bilo kakva promjena podrazumijeva fazu amandmana. Slijedeća tačka dnevnog reda je Informacija o izvršenju Budžeta Općine Ilijaš za period 01.01.-30.09.2015. godine i sve što ste kazali trebali ste kazati pod ovom tačkom dnevnog reda i o tome se samo radi. I ovo nije kanisanje sjednice već je to Poslovnik OV-a Ilijaš.

ADEM EFENDIĆ – vijećnik SBB-a

Obzirom da je načelnik i služba, kojoj je povjerio, stručna i vješta u pripremi i izradi budžeta, tako i Klub SBB-a nema primjedbi na ovaj rebalans Budžeta. Jedina naša primjedba koja teče već tri godine, jeste da bi općinski načelnik i nadležna služba koja priprema izradu Budžeta, trebali razgovarati sa svim vijećnicima, odnosno klubovima vijećnika da se ne bi dešavalo ovo što se danas dešava na sjednici.

Ova moja sugestija neka ujedno bude i inicijativa za općinskog načelnika.

Sve su pohvale za općinskog načelnika i službu i naravno nas koji podržavamo njihov rad.

NEDIM MATORUGA – vijećnik SDA

Ispred KV SDA ću se, prije svega, zahvaliti Skupštini Kantona Sarajevo koja je imala sluha za potrebe Općine Ilijaš i imali su dobru saradnju, kako sa rukovodstvom Općinskog vijeća Ilijaš, tako i sa općinskim načelnikom i kao rezultat te saradnje evo imamo već drugo uvećanje budžeta. Dakle, samo zvanično da se zahvalim Supštini Kantona Sarajevo, svim institucijama Kantona Sarajevo, kao i svim višim nivoima vlasti, dakle Federaciji i svim onim koji su nas podržali u našim projektima.

Diskutanata po ovoj tački dnevnog reda više nije bilo, pa je OV-e, uz predloženi amandman, jednoglasno donijelo

Izmjene i dopune Budžeta Općine Ilijaš za 2015. godinu

AD-4

Informacija o izvršenju Budžeta Općine Ilijaš za period 01.01.-30.09.2015. godine

NIJAZ RASTODER – vijećnik LDS-a

Na prethodnoj tački smo usvojili povećanje 500.000,00 KM za puteve. Uvijek goruće

pitanje u Općini Ilijaš jesu putevi, jer ako igdje ima "mahinacija", onda je to ovdje, pa me interesuje koje firme izvode rekonstrukciju na ovim putevima, mostovima itd.

AKIF FAZLIĆ – općinski načelnik

Kada je u pitanju ova godina i rekonstrukcija puteva radile su tri firme na ovim poslovima. Najveći dio posla je radila firma "Halilović" d.o.o. Ilijaš, druga firma je "Citar-produnkt" koja je radila sa Direkcijom za ceste i treća firma je "Sarajevo-putevi" koji su zajedno radili sa nama i Fondacijom za obnovljivi povratak.

Diskutanata po ovoj tački dnevnog reda više nije bilo, pa je OV-e primilo k znanju

Informaciju o izvršenju Budžeta Općine Ilijaš za period 01.01.-30.09.2015. godine

AD-5

Prijedlog Odluke o zonama sanitarne zaštite i zaštitnim mjerama za izvorište "Vrutak"

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o zonama sanitarne zaštite i zaštitnim mjerama za izvorište "Vrutak"

AD-6

Prijedlog Odluke o zonama sanitarne zaštite i zaštitnim mjerama za izvorišta "Petnjik", "Tuk", "Javor" i "Korita", u MZ Dragoradi

MAHIR DEVIĆ – zamjenik predsjedavajućeg

Naglasio je da je u ovom Prijedlogu Odluke došlo do tehničke greške, gdje u članu 3. nedostaje dio teksta. Naime, iza riječi "Četvrta zaštitna zona – zona sa preventivnim zabranama o ograničenjima;" treba dodati slijedeći tekst:" (3) Prema stupnju opasnosti od zagađenja i drugih štetnih uticaja koji mogu nepovoljno djelovati na zdravstvenu ispravnost vode ili na izdašnost izvorišta "Korita", uspostavljaju se dvije zaštitne zone:".

Diskutanata po ovoj tački dnevnog reda više nije bilo, pa je OV-e jednoglasno donijelo

Odluku o zonama sanitarne zaštite i zaštitnim mjerama za izvorišta "Petnjik", "Tuk", "Javor" i "Korita", u MZ Dragoradi

AD-7

Prijedlog Odluke o davanju saglasnosti za zaključivanje i potpisivanje aneksa ugovora o prodaji (k.č.br.1507/5 i 1508/2 K.O. Ilijaš Grad – novi premjer)

SADETA BRKIĆ – pomoćnica načelnika za imovinsko-pravne poslove, geodetske poslove i katastar

Ugovorom o kupoprodaji koji je zaključen dana 24.06.2015. godine kod Notara Suljević Sefedina iz Ilijaša između Općine Ilijaš koju zastupa Općinski Načelnik i Đozo Selime kći Rašida iz Sarajeva u tački VI 4. utvrđeno je da su ugovorene strane saglasne da se izvrši upis zabilježbe zabrane otuđenja i opterećenja predmetne nekretnine bez izričite saglasnosti prodavca, do izdavanje odobrenja za upotrebu objekta. Kupac Đozo Selima

svojim zahtjevom od 14.10.2015. godine obratila se Općinskom vijeću Općine Ilijaš putem ove Službe za davanje saglasnosti za otuđenje nekretnina koje su kupljene na osnovu ugovora o kupoprodaji iz člana 1. navedenog ugovora iz porodičnih i zdravstvenih razloga. Do sada je u potpunosti uplaćena kupoprodajna cijena kako je ugovorom bila predviđena obaveza u iznosu od 144.375,00 KM. Današnji prijedlog Odluke odnosi se na davanje saglasnosti općinskom načelniku da potpiše takav ugovor da se prenese pravo vlasništva sa Đozo Selime na firmu "Semina" koja će graditi, podnijeti zahtjev za urbanističku i dalje graditi na lokalitetu industrijske zona na predmetnom zemljištu. Komisija za Statut i propise nije imala primjedbi na pravni osnov i pravno-tehničku usklađenost ove Odluke.

Diskutanata po ovoj tački dnevnog reda više nije bilo, pa je OV-e sa 20 glasova ZA i 4 PROTIV donijelo

Odluku o davanju saglasnosti za zaključivanje i potpisivanje aneksa ugovora o prodaji
(k.č.br.1507/5 i 1508/2 K.O. Ilijaš Grad – novi premjer)

AD-8

Prijedlog Odluke o usvajanju "Lokalnog akcionog plana za provedbu UN Rezolucije 1325 u Općini Ilijaš za period 2016-2017. godine

Samra Filipović-Hadžiavdić – direktorica Agencije za ravnopravnost spolova BiH

Bosna i Hercegovina je potpisnica mnogih međunarodnih dokumenata. Međutim, provođenje tih dokumenata ide od državnog nivoa, preko federalnog, kantonalnog i općinskog. BiH je kao članica UN-a bila u obavezi da izradi akcioni plan po UN-ovoj rezoluciji vijeća sigurnosti 1325 - Žene mir i sigurnost i to je uradila kao šesta država u čitavom svijetu. Već nam je na snazi drugi akcioni plan koji predviđa određene aktivnosti vezane za povećanje broja žena u mirovnim misijama, odbrani, policiji. Naša intencija, idemo korak unaprijed, je da svi strateški dokumenti koje imamo na državnom nivou se spuste na lokalni nivo kao što je ovaj. Ovaj Lokalni akcioni plan obuhvata koncept ljudske sigurnosti i predviđa unapređenje sigurnosti građana i građanki i sadrži tri cilja: aktivnosti, indikatore, nosioce odgovornosti, rokove provedbe i izvore finansiranja. Za određene aktivnosti nisu potrebna finansijska sredstva, dok za određeni broj aktivnosti računamo i na donatorska sredstva u određenom iznosu, jer svjesni smo da državni budžeti, a i budžeti svih ostalih nivoa, a naročito općinski su ograničeni. Želim istaći da postoje spremnost donatora da finansiraju ove aktivnosti, ali usvojene lokalne politike i akcioni planovi otvaraju put ka lakšem mobiliziranju tih sredstava. Koristim priliku da se zahvalim načelniku općine Ilijaš, kao i svim njegovim saradnicima i saradnicama.

Diskutanata po ovoj tački dnevnog reda više nije bilo, pa je OV-e sa 23 glasa ZA i 1 UZDRŽANIM donijelo

Odluku o usvajanju "Lokalnog akcionog plana za provedbu UN Rezolucije 1325 u Općini Ilijaš za period 2016-2017. godine

Uslijedila je pauza od 11:30-11:45h.

AD-9

Prijedlog Odluke o načinu i uslovima prodaje neizgrađenog građevinskog zemljišta
(k.č.br.1033/7, 968/10, 965/6, 964/6, 963/6 K.O. Ilijaš Grad - novi premjer)

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o načinu i uslovima prodaje neizgrađenog građevinskog zemljišta
(k.č.br.1033/7, 968/10, 965/6, 964/6, 963/6 K.O. Ilijaš Grad - novi premjer)

AD-10

Prijedlog Odluke o načinu i uslovima prodaje neizgrađenog građevinskog zemljišta
(k.č.br.1506/2 i 1505/2 K.O. Ilijaš Grad - novi premjer)

Diskutanata po ovoj tački dnevnog reda nije bilo, pa je OV-e sa 23 glasa ZA i 1 UZDRŽANIM donijelo

Odluku o načinu i uslovima prodaje neizgrađenog građevinskog zemljišta (k.č.br.1506/2 i 1505/2 K.O. Ilijaš Grad - novi premjer)

AD-11

Prijedlog Odluke o načinu i uslovima prodaje neizgrađenog građevinskog zemljišta
(k.č.br.56 K.O. Ilijaš Grad - novi premjer)

Diskutanata po ovoj tački dnevnog reda nije bilo, pa je OV-e sa 23 glasa ZA i 1 UZDRŽANIM donijelo

AD-12

Prijedlog Odluke o izmjeni Odluke o neposrednoj pogodbi za prodaju neizgrađenog građevinskog zemljišta (Odluka br.01/1-02-2452-13/15 od 29.09.2015. godine)

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o izmjeni Odluke o neposrednoj pogodbi za prodaju neizgrađenog građevinskog zemljišta (Odluka br.01/1-02-2452-13/15 od 29.09.2015. godine)

AD-13

Prijedlog Odluke o izmjenama i dopunama Pravilnika o stipendiranju i nagrađivanju izuzetno nadarenih učenika i studenata

MAHIR DEVIĆ – zamjenik predsjedavajućeg

Prošle sjednice smo ovo izmjenili, ali smo napravili jednu grešku u objavi u smislu da je bio samo definisan Sarajevski univerzitet, pa bi na taj način diskriminirali druge univerzitete, tako da trebamo izvršiti tu ispravku.

Diskutanata po ovoj tački dnevnog reda nije bilo, pa je OV-e jednoglasno donijelo

Odluku o izmjenama i dopunama Pravilnika o stipendiranju i nagrađivanju izuzetno nadarenih učenika i studenata

AD-14

Prijedlog Rješenja iz imovinsko-pravne oblasti broj:04-31-853/05

Diskutanata po ovoj tački dnevnog reda nije bilo, pa je OV-e jednoglasno donijelo

AD-15

Saglasnost na izmjenu namjene lokaliteta kojim je planirana sportska ploha (košarkaško igralište) u namjenu za potrebe izgradnje parking prostora, na lokalitetu Banovac, a u obuhvatu Regulaciono plana Banovac

AKIF FAZLIĆ – općinski načelnik

Svi znate za problem parkiranja na Banovcu. Imamo i Regulacioni plan koji je ovaj konkretni lokalitet definisao kao košarkaško igralište i ima još treću stvar koja se zove finansijska sredstva. Kako smo uspjeli dogovoriti sa Ministarstvom saobraćaja u Vladi Kantona Sarajevo dobijanje grant sredstava za rekonstrukciju parkirališta na području Općine Ilijaš, mi predlažemo da se taj lokalitet iz tih sredstava asfaltira koji može u prvoj namjeni poslužiti kao parkiralište, a ova Odluka koja tretira promjenu namjene, ponovo se može definisati i redefinisati. Po meni je bitna suština, a suština je da se dobijena finansijska sredstva iskoriste i da ovu plohu asfaltiramo i da na tu plohu, kada se nekada procjeni od strane ovog Vijeća, mogu se kupiti koševi i uraditi košarkaško igralište. Šteta je da dobijena sredstva ne iskoristimo i asfaltiramo tu plohu.

NIJAZ RASTODER – vijećnik LDS

Postavljam pitanje načelniku, da li je ovo izmjena Regulacionog plana ili nije izmjena. Za mene ovaj prijedlog nije prihvatljiv.

AKIF FAZLIĆ – općinski načelnik

Nije izmjena Regulacionog plana.

NIJAZ MAŠIĆ – vijećnik SBB-a

Volio bih da se izgovoreno za govornicom ispoštuje. Mi smo jedini grad koji nema igrališta za djecu. Ako nedostaje parkinga, pa praviti ćemo. Ako je ovo način da povučemo sredstva i odmah postavimo koševe, ja to podržavam.

AKIF FAZLIĆ – općinski načelnik

Svi ste dobili izvod iz Regulacionog plana Banovac u kome je jasno da se sve uske saobraćajnice predviđene za pretvaranje u pješačke staze i u ovoj Saglasnosti piše "do uspostave pješačkih komunikacija" i sada treba da budemo "mudri i pametni" da uzmemo 20.000 KM i asfaltiramo tu plohu.

Diskutanata po ovoj tački dnevnog reda više nije bilo, pa je OV-e pristupilo glasnju, ali je izjavljena sumnja u glasanje, te se pojedinačno glasalo.

ZA su glasali slijedeći vijećnici: Mahir Dević, Nedim Matoruga, Saudin Durmić, Halid Dizdarević, Muamera Masnopita, Muamer Dervišević, Rasim Šehić, Selma Pušina, Alan Šerak, Marioneta Ilić-Jureta, Selver Harić, Edhem Hasanović, Asim Mujić, Besim Glijiva, Aida Mališević, Nihad Bučuk, Muhamed Handžić i Enes Dizdarević.

PROTIV su bili slijedeći vijećnici: Adem Efenić, Nijaz Mašić, Sead Šehić, Akif Bešlija i Nijaz Rastoder.

Odsutan: Fahir Hasanović

Konstatovano je da je sa 18 glasova ZA i 5 PROTIV OV-e dalo

Saglasnost na izmjenu namjene lokaliteta kojim je planirana sportska ploha (košarkaško igralište) u namjenu za potrebe izgradnje parking prostora, na lokalitetu Banovac, a u obuhvatu Regulaciono plana Banovac

AD-16

Informacija o uspjehu i odgoju učenika u osnovnim i srednjim školama, na području općine Ilijaš u školskoj 2014/2015. godini

Diskutanata po ovoj tački dnevnog reda nije bilo, pa je OV-e primilo k znanju

Informaciju o uspjehu i odgoju učenika u osnovnim i srednjim školama, na području općine Ilijaš u školskoj 2014/2015. godini

Zatim je zamjenik predsjedavajućeg OV-a Ilijaš Mahir Dević zaključio 34. sjednicu OV-a u 13:00h.

Zapisničar:
Maida Habibović

ZAMJENIK PREDSEDJAVAJUĆEG
OPĆINSKOG VIJEĆA ILIJAŠ

Mahir Dević, prof.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov@ilijas.ba
Broj certifikata:20938

